

estoit la coppie de son propre original, ou s'il avoit simplement voulu faire une entrée differente du desseing des autres Chevaliers; sçachant que mal-aisement, ilz pourroyent avoir une semblable pensée, & que la diversité & l'invention sont les choses qui contentent le plus és resiouissances de cétte nature: Car il avoit assorty à son malheur (effectif ou contrefait) sa prose, ses vers, ses chevaux, & tout son equipage. Il avoit inventé une façon de vestemens toute particuliere pour luy & pour ses gens, & fait jusqu'a son nom qui n'avoit jamais esté leu dans aucun Roman, s'estant baptisé *Le Chevalier des Larmes*, & n'ayant point voulu de nom propre, affin de passer absolument pour incognu.

Il estoit seul de son party; les habitz de tous ceux qui l'accompagnoyent, & leurs toques, les couvertures^a, selles, harnois & bardes de ses chevaux, estoyent de taffetas noir, garny de houppes de gaze d'argent, bordé d'escailles d'argent, & plein de larmes d'argent sans nombre, avec le chiffre de leurs Altezzes & celuy d'une Maistresse. Tous ses chevaux estoyent de mesme poil & noirs, comme s'ilz eussent porté le deuil de l'affliction de leur maistre. Tous ses masques noirs, ayant chaqu'un une grosse larme d'argent à l'œil. Tous les gandz bottes & souliers noirs pleins de larmes; les bastons des ses estaffiers & ses quatre lances, noires pleines de larmes, ayans les chiffres de leurs Altezzes & celuy de sa dame sur le tronçon.

Estant asséz proche du camp, il envoya un de ses trompettes à la barriere, pour faire sa chamade, & presenter un pappier noir, fermé de soye noire, au Mareschal de Camp des Bataves, affin qu'il le portast aux Iuges. En voicy la teueur. [B v]

RESPONCE
DV CHEVALIER
DES LARMES,
AV CARTEL
DES CHEVALIERS BATAVES.

LE CHEVALIER DES LARMES outragé de l'Amour & de la Fortune, se desespérant d'estre regardé de travers de l'un, qui à les yeuz voilé; Et de n'estre pas apperceu de l'autre, pourçe qu'elle luy tourne le dos: s'est deliberé d'employer son courage, par tout ou la force de son ame trouvera le plus de resistance; affin de terminer une vie si traversée que la sienne, ou de la prolonger genereusement.

Et ayant appris de la renommée, qu'il ny a point de lieu, ou l'adresse & la valeur soyent si communes qu'en ce païs, ou (par la magnanimité du Prince) les miracles de proüesse sont ordinaires; il s'y est transporté, croyant y rencontrer plus d'obstacle, & par consequent y devoir acquerir plus d'honneur & de gloire. [...] Estant resolu de maintenir a tout outrance. Que la beauté de sa Dame est sans comparaison; Et que la cause de son affliction est plus juste que celle de leur joye. [B 2r]

Déz que le[s] trois Iuges du Camp eurent leu çette responçe & l'eurent fait veoir à son Altezze, le susdit Mareschal de Camp des Bataves, vint au devant du Chevalier des larmes, & le conduisit á l'eschaffault de la Roynie & de leurs Altezzes [...]. Il marchoit en çet ordre.